

## **Jacco de Zwollenaer:**

't Fenomeen " **Jacco de Zwollenaer** " begint te bereiken wat ij ook graag wil.

Der wört ook niet akelig weinig völle aover em epraot.

Met grote regelmaat wört mi'j evraogd, of preberen ze mi'j uut te euren of ik 't misskien binne dan wel of ik wete wie 't is.

A-k 't goed ebbe begrepen is dät now net wat Jacco wil bereiken. Wärken op de achtergrond zonder zien perseuntien naor veuren te skoeven.

Now veur alle dudelijkheid . . . ik zitte niet of pagiesboek !

Mien eigen name kump ter misskien nog wel op veur, maer ook dät bin ik niet.

le maggen oe ofvraogen wöörumme niet? . . . Want ie ebt ter wel op-ezèten.

Dät zal ik oe uutlègen. Ik ebbe een ongeleufelijke ekel ekrègen an die verskrikkelijke Amerikaanse mentaliteit van 't iewig maer achteralen van data in de vörm van mailadressen. Ik ware actief met face-book, zowel privé as met een zakelijke pagina en wolle ook met een pagina veur Görendrögien kommen maer, dät onbeskofte vissen naor . . . ken ie die of die en dan mu-j ook alles nog leuk vinnen ook? le maggen nieties angèven da-j iets niet leuk vinnen. En vergèet niet; op de achtegrond wört der beoorlijk geld met verdient deur de koppelingen van gegèvens van wie met wie connecties ef.

Sociale media ? Ik blieve liever mi'jzelf, zonder mi'j te laoten opzadelen met wat anderen allemaole wel denken te mutten vinnen. Ik eb al eel jong eleerd dät ienzaam-eid in een groep nog völle ärger is dan dä-j allenig bint. Ik wete wat-k kan en nog bèter wat niet (meer) kanne en dät wil ik wel graeg zo laoten.

Dus op de vraoge of ik soms ook Jacco de Zwollenaer binne ? . . . Nee !

Ik wete dät der mensen bint die mi'j niet geleuven, maer ik kan un 't geleuf ook niet gèven. Dät is absoluut niet mien prebleem.

Ik vinne prachtig dät Jacco der in slaagt de goegemeente, die 't Zwols nog een bettien gebrök in spraeke en skrift, zo allemachtig in bereuring kan kriegen. Wetende dät der mensen bint die al ele liesten ebben anelegd van meugelijke kandidaten van wie 't wel is zollen kunnen wèèn. . . . Streep Görendrögien now maer deur . . . Ik bin 't niet.

En an Jacco de Zwollenaer :

Laot ze maer zweten . . . Goed edaon !

